



Dopo che i oms da ostarie lu vevin sbeleât par ben, Pauli Matuç si jere rabiât e al veve prometût che si sarès copât, sfantantsi intun mût straordenari. Si sarès butât jù dal cjampanili!

Une pidade tal cûl dal ostîr lu veve slontanât e Pauli al jere lâ a cjase sbrufant e pontant il dêt viers chei oms che cumò lu coionavin ancjemò di plui. Passade cualchi zornade, duçj a vevin smenteade la sô buride.

Fintremai in chê sere.

Sul barcon da cele cjampanarie al jere saltât fûr Pauli Matuç e al veve berlât a plen pet.

— Maladets! Par colpe vuestre cumò mi copi!

E duçj lu vevin viodût butâsi intal vuetit, bande il boscut daûr da glesie.

Svelts i oms da ostarie a vevin molât cui il tai, cui il zûc di cjartis, cui la more, e a jerin corûts daûr da tor. Ma dal cuarp di Pauli nancje un fruçon. Sparît.

E ancje cun misteri!

L'indoman matine l'ispetôr Toful al jere za su la scjalute che a puartave inte cele cjampanarie, ma no si viodeve nissun segn particolâr.

— Indulà isal Cartiz? — L'ispetôr al jere za rabiôs. — Pauli al scuen jessi muart! Ma dulà isal il cuarp?

Inte sagristie, il so amì e consulent al stave denant di un spieli che il plevan al doprave par cjalâsi la vieste, prin di scomençâ lis funksions.

— Cjarissim ispetôr, chest spieli al è sbecât sui cjantons!

— Cuissà trops agns che al à, Cartiz. Al è normâl!

— Nol è stât il timp! Chest spieli al è stât spostât e intal viaç al è stât ruvinât!

Nancje finît di cjacarâ, Cartiz lu veve dispicjât dal mûr e al jere lâs sù pe scjalute che a puarte inte cele cjampanarie. Poiât il spieli su la cjampane piçule, e pontât viers la place, al veve clamât l'ostîr, che di abàs si jere zirât a cjalâ la piche da tor.

Di bot, Cartiz al jere sparît, butantsi inte trombe dal cjampanili e rimpinantsi svelt inte scjalute.

L'ostîr al veve scocolât i voi.

— Un altri che si è butât jù dal cjampanili!

Un biel riflès. Cussì al veve fat Pauli Matuç, par dopo puartâ jù e sistemâ par ben il spieli, intant che ducj lu cirivin tal bosc.

Prin o dopo lu varessin cjatât.

Intal mont dai vîfs, però, no ciert in chel dai muarts!

di Massim Furlan

#1056